



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

11.02.2022թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2022/17**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Պատվիրատու՝ Միասնական սոցիալական ծառայություն
Մասնակից՝ «Լիոն սեքուրիթի սերվիս» ՍՊԸ

Մասնակցությամբ՝
«Լիոն սեքուրիթի սերվիս» ՍՊԸ-ի տնօրեն՝ Էդ. Թովմասյանի,

Գնման ընթացակարգի ծածկագիրը և առարկան՝
«ՄՍԾ ԷԱՃԾՁԲ-22/1» ծածկագրով էլեկտրոնային աճուրդի ընթացակարգ,
անվտանգության ապահովման ծառայությունների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ), ուսումնասիրելով Հայաստանի Հանրապետության ֆինանսների
նախարարության կողմից 14.01.2022թ.-ի թիվ 26/26-1/634-2022 գրությամբ «Լիոն
սեքուրիթի սերվիս» ՍՊԸ-ին (այսուհետ նաև՝ Մասնակից) գնումների գործընթացին
մասնակցելու իրավունք չունեցող մասնակիցների ցուցակում ներառելու նպատակով
նախաձեռնված ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

ՀՀ ֆինանսների նախարարությունը, Միասնական սոցիալական ծառայության 07.01.2022թ. թիվ 02/ԳՋ/530-2022 գրության հիման վրա, 14.01.2022թ.-ին «Լիոն սեքուրիթի սերվիս» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 14.01.2022թ.-ին:

17.01.2022թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2022/17 համարի ծածկագիրը:

26.01.2022թ.-ին և 11.02.2022թ.-ին նշանակվել և հրավիրվել են նիստեր:

Գործի քննությունն ավարտվել է 26.01.2022թ.-ին և Բողոքներ քննող անձի որոշման հրապարակման օր է նշանակվել 11.02.2022թ.-ին:

2. Միասնական սոցիալական ծառայության ներկայացրած փաստերը և դիրքորոշումը.

Միասնական սոցիալական ծառայությունը 07.01.2022թ. թիվ 02/ԳՋ/530-2022 գրությամբ դիմել է ՀՀ ֆինանսների նախարարությանը՝ (այսուհետ նաև՝ Պատվիրատու) հայտնելով հետևյալը.

«Տեղեկացնում եմ Ձեզ, որ 2021 թվականի հոկտեմբերի 27-ին Միասնական սոցիալական ծառայության (այսուհետ՝ Ծառայություն) կողմից ՄՍԾ ԷԱԾԾՁԲ-22/1 ծածկագրով հայտարարվել է Ծառայության կարիքների համար անվրանգության ապահովման ծառայությունների գնման ընթացակարգ:

Գնման ընթացակարգի շրջանակում հայտեր են ներկայացրել թվով յոթ կազմակերպություն՝ այդ թվում «Լիոն Սեքուրիթի Սերվիս» ՍՊԸ-ն (այսուհետ՝ Ընկերություն): Գնահատող հանձնաժողովի 2021թ. նոյեմբերի 8-ի որոշմամբ Ընկերությունը ճանաչվել է ընտրված մասնակից:

2021 թվականի նոյեմբերի 25-ին «Լիոն Սեքուրիթի Սերվիս» ՍՊԸ-ի կողմից ներկայացվել է բողոք: ՀՀ գնումների հետ կապված բողոքներ քննող անձի թիվ ԳԲԲԱ-ՆԳ-2021/87 որոշմամբ «Լիոն Սեքուրիթի Սերվիս» ՍՊԸ-ի կողմից ներկայացված բողոքը մերժվել է, որից հետո (eauction.armeps.am) համակարգի միջոցով հրավերով սահմանված ժամկետում Ընկերությանը ուղարկվել է ծանուցում պայմանագիր կնքելու վերաբերյալ:

Ծանուցումը ստանալուց հետո Ընկերությունը հրավեր 1-ին մասի 9.3 կետով սահմանված ժամկետում չի ստորագրել պայմանագիրը և Պատվիրատուին չի ներկայացրել որակավորման և պայմանագրի ապահովումները:

Գնահատող հանձնաժողովի 2022թ. հունվարի 4-ի որոշմամբ ՄՍԾ ԷԱՃԾՁԲ-22/1 ծածկագրով գնման ընթացակարգը հայտարարվել է չկայացած Գնումների մասին ՀՀ օրենքի 37-րդ հոդվածի 1-ին մասի 4-րդ կետի հիման վրա:

Հաշվի առնելով վերոգրյալը, խնդրում եմ Ձեզ ՀՀ կառավարության 04.05.2017թ. թիվ 526-Ն որոշման 45-րդ կետի պահանջներին համապատասխան սահմանված կարգով ընթացք տալու համար:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՄՍԾ ԷԱՃԾՁԲ-22/1» ծածկագրով հայտարարված գնման ընթացակարգի շրջանակներում «Լիոն սեքուրիթի սերվիս» ՍՊԸ-ի տվյալները՝ համապատասխան հիմքերով:

3. «Լիոն սեքուրիթի սերվիս» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 17.01.2022թ.-ի գրությամբ դիմել է «Լիոն սեքուրիթի սերվիս» ՍՊԸ-ին՝ հնարավորություն տալով ՀՀ ֆինանսների նախարարության կողմից 14.01.2022թ.-ի թիվ 26/26-1/634-2022 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, ներկայացել է հրավիրված նիստերին:

«Լիոն սեքուրիթի սերվիս» ՍՊԸ-ն 09.02.2022թ.-ին ներկայացրած գրությամբ հայտնել է հետևյալը.

«<Լիոն Սեքուրիթի Սերվիս> ՍՊԸ-ն բողոք է ներկայացրել ՄԻԱՍՆԱԿԱՆ ՍՈՑԻԱԼԱԿԱՆ ԾԱՌԱՅՈՒԹՅԱՆ դեմ և սա 13,12,21թ-ի ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2021/87 որոշմամբ <Լիոն Սեքուրիթի Սերվիս> ՍՊԸ-ի կողմից ներկայացված բողոքը մերժվել է: Որոշումը հրապարակվել է gnumner.am կայքում 14.12.21թ-ին:

Որից հետո առ 04.01.22թ-ին ՄԻԱՍՆԱԿԱՆ ՍՈՑԻԱԼԱԿԱՆ ԾԱՌԱՅՈՒԹՅԱՆ կողմից սաացվել է էլեկտրոնային նամակ որտեղ գրված է որ ՄՍԾ ԷԱԾԾԶԲ-22/1 ծածկագրով հրապարակվել է նոր արձանագրություն:

Արձանագրության մեջ նշվում էր, որ ՄԻԱՍՆԱԿԱՆ ՍՈՑԻԱԼԱԿԱՆ ԾԱՌԱՅՈՒԹՅՈՒՆԸ (eauction.armeps.am) համակարգի միջոցով հրավերով սահմանված ժամկետում ընկերությանը ուղարկվել է ծանուցում պայմանագիր կնքելու վերաբերյալ: Ծանուցումը ստանալուց հետո Ընկերությունը հրավերի 1-ին մասի 9.3 կետով սահմանված ժամկետում չի ստորագրել պայմանագիրը և Պատվիրատուին չի ներկայացրել որակաորման և պայմանագրի ապահովումները և գրկվել է պայմանագիրը ստորագրելու իրավունքից:

Ուրեմն պայմանագիր կնքելու վերաբերյալ ծանուցումը Պատվիրատուն պետք է ուղարկեր 14.12.21թ-ից մինչև 18.12.21թ-ի ընկած ժամանակահատվածում, որպեսզի 2022թ-ի հունվարի 3-ի օրվա դրությամբ ՀՀ գնումների մասին օրենքի 38 հոդվածի 3-րդ կետի համաձայն եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում չի ստորագրում պայմանագիրը և պատվիրատուին չի ներկայացնում որակաորման և պայմանագրի ապահովումները ապա նա գրկվում է պայմանագիր ստորագրելու իրավունքից/ լրանար 10 աշխատանքային օրը: Բայց ընկերությունը նման ծանուցում չի ստացել:

Եթե համակարգի միջոցով ուղարկվում է ծանուցում, ապա ծանուցում ստացող ընկերությունը համակարգից պետք է ստանա էլեկտրոնային նամակ այդ ծանուցման մասին, բայց ընկերությունը էլ. փոստի միջոցով չի ստացել ծանուցում պայմանագիր կնքելու վերաբերյալ:

Այդ նույն ձևով համակարգի միջոցով Պատվիրատուն ուղարկել էր մի քանի ծանուցումներ և այդ ծանուցումները ստացվել էին մեր ընկերություն կողմից: Մասնաորապես՝

1 առ 08.11.21 թ-ին ուղարկած ծանուցումը անգործության ժամկետի սկսելու մասին- էլ. Փոստի սրբինը կցվում է

2. առ 19.11.21 թ-ին ուղարկված ծանուցումը պայմանագիր կնքելու վերաբերյալ - էլ. Փոստի սքրինը կցվում է

3. առ 04.01.22 թ-ին ուղարկված ծանուցումը արձանագրություն / հրապարակվել է նոր արձանագրություն - էլ. Փոստի սքրինը կցվում է

Մեր ընկերությանը ուղարկվել է Auaction համակարգից դուրս բերված փաստաթուղթ առ 24.11.21 թ-ի շնորհման մասին:

Խնդրում ենք ՄԻԱՍՆԱԿԱՆ ՍՈՑԻԱԼԱԿԱՆ ԾԱՌԱՅՈՒԹՅԱՆԸ նույն ձևի փաստաթուղթ ներկայացնի 14.12.21 թ-ից մինչև 18.12.21 թ-ի ընկած ժամանակահատվածի համար»:

4. ԱՑ-ԼՕ-2022/17 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. Միասնական սոցիալական ծառայության կողմից անվտանգության ապահովման ծառայությունների ձեռքբերման նպատակով 27.10.2021թ.-ին հայտարարվել է «ՄՍԾ ԷԱԾԾՁԲ-22/1» ծածկագրով էլեկտրոնային աճուրդի ընթացակարգ (այսուհետ նաև՝ Ընթացակարգ):

ii. Ընթացակարգին մասնակցելու նպատակով հայտ է ներկայացրել նաև «Լիոն սեքուրիթի սերվիս» ՍՊԸ-ն:

iii. Մասնակիցը մասնակցության հայտի թիվ 1 հավելվածով՝ գնման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՄՍԾ ԷԱԾԾՁԲ-22/1» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում է ընտրված մասնակից ճանաչվելու դեպքում, հրավերով սահմանված կարգով և ժամկետում, ներկայացնել որակավորման ապահովում:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 08.11.2021թ.-ին կայացված նիստի թիվ 2 արձանագրության համաձայն՝ ընտրված մասնակից է ճանաչվել «Լիոն սեքուրիթի սերվիս» ՍՊԸ-ն:

v. 08.11.2021թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է

պայմանագիր կնքելու որոշման մասին հայտարարություն և սահմանվել է անգործության ժամկետ՝ 10 օրացուցային օր:

vi. Պատվիրատուն 19.11.2021թ.-ին eauction.armeps.am համակարգի միջոցով Մասնակցի 0099555587@mail.ru էլ. փոստի հասցեին է ներկայացրել է «ՄՍԾ ԷԱՃԾՁԲ-22/1» ծածկագրով պայմանագրի նախագիծը:

vii. Պատվիրատուն 24.11.2021թ.-ին eauction.armeps.am համակարգի միջոցով Մասնակցին ներկայացրել է «ՄՍԾ ԷԱՃԾՁԲ-22/1» ծածկագրով պայմանագրի նախագիծը՝ հայտնել է, որ «ՄՍԾ ԷԱՃԾՁԲ-22/1» ծածկագրով էլեկտրոնային աճուրդի ձևով անվտանգության ապահովման ծառայությունների գնման նպատակով հայտարարված գնման ընթացակարգի գնահատող հանձնաժողովի 2021թ. նոյեմբերի 8-ի որոշմամբ «Լիոն Սեքուրիթի Սերվիս» ՍՊԸ-ն ճանաչվել է որպես ընտրված մասնակից: Հիմք ընդունելով վերոգրյալը կից ներկայացնում ենք «ՄՍԾ ԷԱՃԾՁԲ-22/1» ծածկագրով պայմանագրի նախագիծը՝ որը Ընկերության հետ կարող է կնքվել «ՄՍԾ ԷԱՃԾՁԲ-22/1» գնման ընթացակարգի հրավերով սահմանված կարգով պայմանագրի և որակավորման ապահովում ներկայացնելու դեպքում խնդրում ենք նշված հրավերով սահմանված ժամկետում՝ պայմանագիր կնքելու մասին ծանուցումը և պայմանագրի նախագիծն ստանալուց հետո կից գրությամբ ներկայացնել պայմանագրի և որակավորման ապահովումները և Մասնակցի կողմից էլեկտրոնային թվային ստորագրությամբ ստորագրված պայմանագրի օրինակը, կամ Մասնակցի կողմից ընդունվող որոշման մասին տեղեկությունները:

viii. «Լիոն սեքուրիթի սերվիս» ՍՊԸ-ն 25.11.2021թ.-ին ՀՀ գնումների հետ կապված բողոքներ քննող անձին ներկայացրել է բողոք և խնդրել է վերոնշյալ մրցույթի բանակցային գործընթացը չեղյալ համարվի և հրավիրել բոլոր մասնակիցներին նոր բանկցությունների, բայց անձնական, առանց աճուրդային /համակարգչով/ համակարգի: «Լիոն Սեքուրիթի Սերվիս» ՍՊԸ-ին չներառել գնումների գործընթացին մասնակցելու իրավունք չունեցող մասնակիցների ցուցակում: Քանի որ առաջարկվող պայմանագրի գինը, որը կազմում է 420.240 /չորս հարյուր քսան հազար երկու հարյուր քառասուն/ ՀՀ դրամ, պակաս է ինքնարժեքից, պահանջում ենք պայմանագիրը չեղյալ համարել: Միասնական սոցիալական ծառայություն կողմից տրված նախահաշվային գինը, կազմում էր 10.000.000 /տաս միլիոն ՀՀ դրամ, որը անհամեմատելի է 350.200 /երեք հարյուր հիսուն հազար երկու հարյուր/ ՀՀ դրամից: Հիմնվելով «Գնումների մասին» ՀՀ օրենքի 28-րդ հոդվածի 1-ին մասի 10-րդ կետով, որ առաջարկվող գինը, ապրանքների, աշխատանքների և ծառայությունների

արժեքից բացի, ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից առաջարկում եմ պայմանագիրը ճանաչել անվավեր: Ապացույցներ Մասնակիցը չի կարող ներկայացնի, քանի, որ գնման գործընթացը տեղի էր ունեցել համակարգի միջոցով: Ուստի միջնորդել է բողոք քննող անձին, որպեսզի նա հարցում կատարի համակարգը սպասարկողին:

ix. ՀՀ գնումների հետ կապված բողոքներ քննող անձ՝ Գ. Ներսիսյանը 13.12.2021թ.-ին կայացված թիվ ԳԲՔԱ-ՆԳ-2021/87 որոշմամբ (հրապարակվել է www.gnumner.am կայքում 14.12.2021թ.-ին) որոշել է «Լիոն սեքուրիթի սերվիս» ՍՊԸ-ի կողմից 25.11.2021թ.-ին ներկայացված բողոքը մերժել:

x. Հանձնաժողովի 04.01.2022թ.-ի նիստի թիվ 3 արձանագրության 1-ին կետի համաձայն՝ գնահատող հանձնաժողովի նախագահը ներկայացրել է, որ «ՄՄԾ ԷԱՃԾԶԲ-22/1» ծածկագրով գնման ընթացակարգի ընտրված մասնակից՝ «Լիոն Սեքուրիթի Սերվիս» ՍՊԸ-ն 2021 թվականի նոյեմբերի 25-ին ներկայացրել է բողոք: ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2021/87 որոշմամբ «Լիոն Սեքուրիթի Սերվիս» ՍՊԸ-ի կողմից ներկայացված բողոքը մերժվել է, որից հետո (eauction.armeps.am) համակարգի միջոցով հրավերով սահմանված ժամկետում Ընկերությանը ուղարկվել է ծանուցում պայմանագիր կնքելու վերաբերյալ: Ծանուցումը ստանալուց հետո Ընկերությունը հրավերի 1-ին մասի 9.3 կետով սահմանված ժամկետում չի ստորագրել պայմանագիրը և Պատվիրատուին չի ներկայացրել որակավորման և պայմանագրի ապահովումները և զրկվել է պայմանագիրը ստորագրելու իրավունքից:

xi. Նույն արձանագրության 2-րդ կետի համաձայն՝ գնահատող հանձնաժողովը հիմք ընդունելով վերոգրյալը, հրավերով սահմանված պահանջների համաձայն, որոշել է «ՄՄԾ ԷԱՃԾԶԲ-22/1» ծածկագրով գնման ընթացակարգը հայտարարել չկայացած՝ «Գնումների մասին» ՀՀ օրենքի 37-րդ հոդվածի 1-ին մասի 4-րդ կետի հիման վրա:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 14.01.2022թ.-ի թիվ 26/26-1/634-2022 գրությամբ «Լիոն սեքուրիթի սերվիս» ՍՊԸ-ին գնումների գործընթացին մասնակցելու իրավունք չունեցող

մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագրի կնքելուց:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագրի կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագրի կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 18.05.2017թ.-ի թիվ 534-Ն հաստատված «Գնումների գործընթացի կազմակերպման» կարգի 10-րդ կետի համաձայն՝ էլեկտրոնային աճուրդով գնումների կատարման և ընտրված մասնակցի հետ պայմանագրի կնքման ժամանակ գործում են Հայաստանի Հանրապետության կառավարության 2017 թվականի մայիսի 4-ի թիվ 526-Ն որոշման 1-ին կետի 1-ին ենթակետով հաստատված կարգով նախատեսված կարգավորումները.....:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ և 13-րդ ենթակետերի համաձայն՝ ընտրված մասնակցին պայմանագրի կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Կենտրոնացված կարգով սննդամթերքի գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը: Ընտրված մասնակցի կողմից

հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթ: Ընդ որում, կենտրոնացված կարգով սննդամթերքի գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Վերոնշյալ դրույթների համակարգված վերլուծության արդյունքում, Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն, որակավորման և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում ներկայացված գնային առաջարկի չափով որակավորման ապահովում, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում, ինչպես նաև չներկայացնելով պայմանագրի ապահովում, վերջինս զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, ինչպես նաև վերջինիս գործողությունները (անգործությունը) գնահատվում են որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը, ինչպես նաև պատվիրատուին չներկայացնելով պայմանագրի օրինակը և/կամ ապահովումը զրկվել է պայմանագիր կնքելու իրավունքից:

Սույն գործի փաստերի հիման վրա՝ Բողոքներ քննող անձն արձանագրում է, որ Միասնական սոցիալական ծառայության կողմից անվտանգության ապահովման ծառայությունների ձեռքբերման նպատակով 27.10.2021թ.-ին հայտարարված «ՄՄԾ ԷԱԾԾԶԲ-22/1» ծածկագրով էլեկտրոնային աճուրդի ընթացակարգի գնահատող հանձնաժողովի 04.01.2022թ.-ին կայացված նիստի թիվ 3 արձանագրության 1-ին կետով արձանագրվել է, որ ՀՀ գնումների հետ կապված բողոքներ քննող անձի թիվ ԳԲԲԱ-ՆԳ-2021/87 որոշմամբ «Լիոն Սեքուրիթի Սերվիս» ՍՊԸ-ի կողմից ներկայացված բողոքը մերժվել է, որից հետո (eauction.armeps.am) համակարգի միջոցով հրավերով սահմանված ժամկետում Ընկերությանն ուղարկվել է ծանուցում պայմանագիր կնքելու վերաբերյալ: Ծանուցումը ստանալուց հետո Ընկերությունը հրավերի 1-ին մասի 9.3 կետով սահմանված ժամկետում չի ստորագրել պայմանագիրը և Պատվիրատուին չի ներկայացրել

որակավորման և պայմանագրի ապահովումները և զրկվել է պայմանագիրը ստորագրելու իրավունքից: Նման պայմաններում գնահատող հանձնաժողովը, հիմք ընդունելով վերոգրյալը, ինչպես նաև հրավերով սահմանված պահանջների համաձայն, որոշել է «ՄՍԾ ԷԱՃԾԶԲ-22/1» ծածկագրով գնման ընթացակարգը հայտարարել չկայացած՝ Գնումների մասին ՀՀ օրենքի 37-րդ հոդվածի 1-ին մասի 4-րդ կետի հիման վրա:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա՝ Բողոքներ քննող անձն եզրահանգում է, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում, ուսումնասիրելով գործում առկա փաստերին ու Պատվիրատուի և Մասնակցի կողմից ներկայացված դիրքորոշումները՝ Բողոքներ քննող անձը փաստում է, որ գործում առկա չէ ապացույց առ այն, որ Մասնակցին

(eauction.armeps.am) համակարգի միջոցով հրավերով սահմանված ժամկետում ուղարկվել է պայմանագիր կնքելու վերաբերյալ ծանուցում՝ վերջինիս 25.11.2021թ.-ին ներկայացրած բողոքը ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2021/87 որոշմամբ մերժվելուց հետո:

Ուստի, նման պայմաններում «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետում նշված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

ՀՀ ֆինանսների նախարարության կողմից 14.01.2022թ.-ի թիվ 26/26-1/634-2022 գրությամբ «Լիոն սեքուրիթի սերվիս» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2022/17 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆԶ՝**



ԼԵՎՈՆ ՕՇԱՆՅԱՆ